

四庫全書

集部

欽定四庫全書

集部

紫山大全集卷十四

詳校官中書臣孫球

侍讀臣孫球覆勘

謄錄監生臣徐元秀

謄錄監生臣馮克鞏

欽定四庫全書

紫山大全集卷十四

元 胡祇遹 撰

表

賀正表

履端正始禮莫重於三朝祈天惠民數無先於百穀八
風應律萬物更新欽惟皇帝陛下體元乾綱立正人統
巍巍乎與天為大蕩蕩乎使民無名德冠百王功垂億
代才寶遠物而遠物畢至懷柔百神而百神效靈無歲

不年有生咸遂不以富庶易恭儉之德不以強武出爭
鬪之兵祚維繼於守成功愈光於創業握乾中之大一
統徹海外而無二家太寧綿綿和氣皞皞臣某等遠叨
貴職遙拱北宸歡溢赤心班阻丹陛願祝無疆之聖壽
敢陳有斐之蕪辭

陰陽寒暑之一周斗寅參午歲月日時之四始律應風
從調元不愆履端正序實萬類惟新之慶旦正一人端
拱之華辰欽惟皇帝陛下德覆堯天聖躋湯日無一物

之失所煦萬國以迴春雍穆九重之深提封四海之外
奇珍異寶發天地之祕藏百譯千言窮古今之未見度
外有苗之弗率坐致蠻荆之來威質不朴而文不華兵
不窮而武不黷千官之文武無敵羣工之技巧殊精聞
遠近不謀之僉言有乾坤以來之聖世鴻休永賴至樂
何窮某等叨任外臺阻陪英列遠瞻天表喜倍恒情日
月風雲同四目四聰之明達雷霆雨露儘八荒八極之
沾濡福履遐齡祝後天而不老神孫聖子同旭日之方

升

賀聖壽表五通

端拱北辰頌訝新秋之光潤祥蒸南海久無今歲之清
寧天生聖人物呈異應紹皇基之千萬祀協嘉運之五
百年太平初基命世斯作星光月潔天清地寧賀九龍
捧日之辰寶四海無疆之福欽惟皇帝陛下天地覆載
雨露涵濡得萬國之歡心無一物之失所分寶玉展親
於伯叔菲飲食致孝乎鬼神九族交歡百靈昭假風從

雨若時和歲豐聽擊壤之歌喧息犬吠之夜警臣某幸
逢慶旦喜倍恒情遠離遐域之海隅來上萬年之聖壽
輒伸荒頌齊助歡聲

祚開昌運懷望者莫不知榮天祚聖人有目者疇非樂
覩共是昇平之臣妾洞攄歡抃之聲容欽惟皇帝陛下
誕集百祥光承五葉明命久符於雲瑞慶源何啻於河
清聖冠百王仁及四海際天所覆重譯來庭好問致察
於邇言大政必諮於元老紀綱法度莫不具舉禮樂刑

政燦然一新發揮先業功多於前人壯固洪基訓明乎
慶裔躬示儉德謀懷永圖不口惠而恩浹乎民心不貨
殖而富藏乎天下九州奠枕庶官得人大開明堂永膺
遐福臣某幸逢聖誕喜倍恒情輒助歡心敬陳荒頌

五星聚奎瑞應誕彌之吉月六龍捧日祥開雍睦之嚴
宸昌運啟而八風和聖人作而萬物覩龍顏天表氣清
萬里之長河乙瑞雲禎慶集千年之異應實宗廟社稷
無疆之福同國交歡得聰明睿智繼世之君普天均慶

駭星流而電繞覺地闢以天開月行金氣之秋神降嵩
呼之壽恭惟皇帝陛下堯仁天覆湯德日新明四目以
達四聰采片言而求片善蓄威昭德不矜號令於雷霆
浮海踰山坐受東南之玉帛幾事無虞而有備內難不
怒而自消公私之倉廩俱豐禮樂與文明丕變選良吏
於二千石草久弊於三十年和氣格天歡聲沸海幸逢
聖旦獲造丹墀願賡擊壤之歌更祝後天之筭實無任
於歡抃不自揆其荒蕪仰瀆聖聰上陳口號

明命格天高靈為之下墮昌圖啟祚率土莫非王臣致
頌禱於僉同豈仙凡之有間河清瑞於萬里山獻壽於
三呼百神懷柔一人有慶恭惟皇帝陛下日新聖德天
縱生知佩孝文之儉節至仁蘊太宗之英謀遠畧動無
過舉尚致察於萬幾安不忘危務敦睦於九族用人不
求備見善能力行風雨時而百穀登財用足而萬民實
弄孫抱子樂郊多黃髮之人坐甲休兵遠戍無綠林之
警日光月潔天清地寧凡曰有知忻逢盛旦臣遐居南

極遙拱北辰常思帝德之瞻光欲進天階而無路幸三
秋之過半慶萬壽之佳辰載整華簪上陳荒頌

金氣司天開神武擴清之昌運瑞雲拱日賀欽明文思
之御辰不世之逢有生同慶欽惟皇帝陛下功邁禹湯
而不足聖踰堯舜而弗居允執謙冲克自抑畏際日月
之臨照奉玉帛以來庭試厯推受命之祥未有如今日
之盛克配上帝守一德不二之恭永佑聖躬享萬歲無
疆之壽臣阻塵法從出領憲司切傾葵藿之懷遐想庭

墀之列身雖在外如臨咫尺之威誠發於中同罄華封之祝

賀尊號表

聖德難名久執不居之謙讓臣衷激切允懷仰報之忠
貞溢光華之無窮豈揄揚之能罄既正徽號宜進賀章
伏惟皇帝陛下德邁唐虞功參天地服上古不臣之士
遂有生咸若之心萬國交歡普天同慶天眷彌厚聖壽
無疆當從容中道之年享垂拱無為之福叛王請罪聖

嗣班師股肱柱石繼踵而還歸貔虎熊羆守邊以鼓舞
際天所覆同我太平臣某等職居外郡列沮庭班均蒙
雨露之恩遙下軒墀之拜

賀冬至表

五陰方盛屆一陽來復之辰八音克諧奏四海會同之
樂一人有慶萬順駢臻茲蓋伏遇皇帝陛下動合民心
奉若天道乾綱振於神馭下情得以上通黜尸居貪祿
之冗員進敢諫直言之多士政由俗革令若風行開張

聖聰恢弘士氣戒守成而不怠酌先業以增光文德武
威遠來近悅臣等叨居詞職主頌聖功幸逢鼓舞之同
歡敢以荒蕪為自棄敬陪百辟仰祝萬年

賀平江南表

天命大一統可能交質為鄭周帝業不偏安豈以長江
限南北顧茲孱宋得自偽周失位中天偷生炎海以寢
微而寢滅尚自大以自尊不畏天威不歸王政少發雷
霆之震怒奚有蠻荒之蘖芳憫念民生不忍兵取遣信

使以溫諭賜詩書以優容迷心累卵之危恃險一舫之
水久留我命毒我邊氓誘我叛亡竊我疆土事至於此
兵不能已而命將出師以順討逆摧枯拉朽破竹燎毛
小人漿食進於壺簞君子玄黃實於筐篚不下益州之
鬪艦坐受石城之降幡萬世峻功普天同慶欽惟皇帝
陛下聖神文武順天應人衆皆曰可而行兵不得已而
用越湯武之不殺躋堯舜之至仁德高百代之前恩漸
四海之表非平吳平陳之可比視格苗格越而益雄盡

地之維邁古昔區域之廣際天所覆無日星雨露之偏
聖祚無疆上天永眷有生萬類同我太平臣某等叨列
外臺賀達陞禮鼓舞餘樂倍百恒情

題

題夢崑所藏東坡帖

東坡手簡行書為第一自得之妙雖晉唐諸賢有不能
及者小楷次之大字又次之草書又次之龍圖二帖非
公平生致意書南方比之周鼎秦符其為大賢寶重也

若此得之者宜如何哉某年月日某觀

題懷素自叙帖

晉賢墨跡歲久腐敗不存唐學士虞褚諸人臨摹逼真
唐賢法書宋蘇米輩復臨之故得流傳至今懷素自叙
帖余所見凡五六本帖書如出一筆不曰聖人吾不得
而見之矣得見君子者斯可矣某年月日某觀

題晦庵易卦橫圖

易圖甚多不唯不能發明易之蘊奧牽強穿鑿通滯合

離不見伏羲畫卦本末生成自然之全圖惟邵康節先天圖原委條貫以類相從然以圓方位置使人不易曉晦菴此圖自下而上大極兩儀四象八卦分陰分陽迭用柔剛而六十四卦粲然成列乾一至坤八自然生成易之全體無毫髮紊亂虧欠此圖一出前人皆廢乾端坤倪軒豁呈露六子萬象咸具于中原始要終不出乎一陰一陽考諸文王周孔之辭則合求諸伏羲一落筆而卦變皆備驗諸天地鬼神而不悖象辭變占不言而

喻學易者當玩之終身而不可厭

題梵隆述古圖

寫萬象易寫人物難山水雲煙昆蟲草木皆有定質惟人也得二五最秀最靈之精英自有生人以來而至於今後至無窮面面不同上而大聖大賢下而至愚至賤賦分稟受又復天壤每觀畫師寫塵俗之人則十九得真寫高人勝士則百不得其一二蓋高人勝士又得天地之奇氣雖造物不易生成畫工塵臆豈能得其髣髴

非李龍眠則不能形容蓮社諸英賢蘇東坡黃山谷米
南宮李伯時蘇黃門晁無咎張文潛秦少游劉巨濟僧
圓通王仲至陳碧虛鄭靖老蔡天啟王晉卿李端叔十
六人想見風采一時龍鸞唯龍眠能儀形之梵隆此幅
亦庶幾欲造龍眠之門墻者歟

跋

跋仲謀提刑家訓圖

道一也駁雜者自分之尊無二上污下者自卑之太史

公以儒雜九流漢室遂以王道霸術相雜公孫弘以儒
術飾吏事法律為詩書自污雜也近世遂以庸俗儒吏
並稱又曰儒吏兼通周官胥史供給呼召指使代筆簿
書督責期會而已非二歧也非並肩也先生當金室垂
亡進則不可隱德于法律脫免里胥之侵凌處心行已
則儒者也諸公贊稱非知先生者也不可以不辨某頌
首謹題

跋臨王右軍帖

絹素經三百年則壞紙可延五百歲晉人墨跡至唐恐不能傳遠虞褚名公以硬黃紙摹之此帖不惟全不失真在右軍諸帖當為得意書山谷題後後來者復何言

跋褚遂良臨黃庭經

唐太宗喜王右軍書故一時學士大夫皆好尚以不能寫字吟詩為可恥向使太宗能以不及堯舜禹湯文武為不足篤好而祖述之觀天文以察時變觀人文以化成天下都俞之際詠勅天之歌垂朽索之誠立朝大臣

則必以臯夔稷契伊傅周召為己任奚遊戲翰墨裁剪律詩而已耶工書者評蘭亭帖惟褚遂良臨本最為得真然則所臨黃庭經亦當為貞觀朝士之冠惟其有之是以似之學者能舍外而工內不及人不為憂矣

跋宋徽宗書

前賢有言文章字畫似其為人余謂曰似不若曰是形諸外者即其中也晉武唐太之字畫創業王天下之英氣浩蕩不可掩宋徽之柔懦纖麗欲不亡國可乎高宗

而下亦苟延歲月者也

跋開闕公字

字畫瘦勁則易肉豐滿而氣清雄則難開闕公贈萬松
秀一帖當為顏平原大字東方朔畫贊碑陰入室之寶
方知任南麓如飽豨肉醉黃酒村學究耳某謹題

跋鹿庵字

士大夫讀書立言之暇游戲翰墨者多而氣稟拔俗者
寡故筆落紙凡鄙百出去胥史雜流為不遠永年王先

生人品高邁心畫當為本朝獨步然世無揚凝式孰以予言為不妄

跋魯公字

魯公擘窠大字見於石四中興頌離堆記東方朔畫贊八開齋舍記畫贊離堆結密清雄點畫全作隸書中興頌齋舍記嚴正開豁點畫全作二篆以四本相較畫贊優於離堆中興頌優於齋舍記竊意妄料書丹不傷其真模勒者頗失筆意歲月風雨離堆已十壞八九中興

頌剝裂不完又不易得但恐數百年後一再勒石去真愈遠如茲石者又不得而見之矣前人有言物聚於所好詩云蔽芾甘棠勿剪勿伐敬其人而愛其物尚且如是况賢者之心畫歟珍護珍護

跋山谷字

余幼學山谷書先人之命也先人嘗曰汝高祖善黃書染楮以屋漏水人莫辨其真贗汝當致力故僕於黃書徑窺其門牆但山谷天資高閑冥鴻野鶴行雲流水氣

質凡下者不可企及長年以來坐自廢棄今觀立之帖
雖非黃氏得意書亦虎章之一斑也党竹谿跋黃書以
謂韻勝失之柔媚然則蕭散閑雅落落不凡不出瘞鶴
銘之下此黃氏之三昧也竹谿之言恐未工耳

跋雪齋字軸

雪齋公學懷素書至於危不忘乎目故能成就如此介
冑虎雄之將與野服黃冠之人態度意韻各有所得不
可以類觀雪齋公書似欲不食煙火食矣

跋王提刑書

明白開朗如青天白日豈弟樂易如惠風時雨正大流
行如長江大河

跋東坡儲祥墨迹

東坡大字忠義清雄如顏平原小字韻勝緊結如李北海
儲祥宮碑奉勅撰并書文理正大因事納諫字畫謹
密中雍容自若不為金注所動

跋宋高宗臨二王帖

志恠者有假屍返魂之說又有人為鬼物所憑四體百骸不變而神色辭氣則非其人矣以類觀之在字學中臨書者實似之高宗當枕戈嘗膽之際而不廢翰墨異哉

跋遺山墨迹

詩文字畫不學前人則無規矩準繩規規於前人陳迹則正若屋上架屋僕自兒童時見先生酒間得筆不擇美惡漫不加意十幅一息迅若掣電當時止知喜其神

速飄逸先生胸中自得之妙則不知也近年來時時復見先生墨妙於河東士大夫家每一展卷覺塵俗鄙吝渙若冰釋此又非書奴輩所知也年月日觀

跋元遺山書橐

汝絳石刻法帖皆前賢與家人輩書橐所取者以瓦注之巧也

跋張長史帖

以秋深不審四字比較郎官石帖若不相似此帖疑柳

誠懸臨二王書也

跋元李詩軸

武帝欲霍去病讀孫子去病曰用兵不學古兵法顧方
畧何如耳士之學書亦如良將之用兵不必模寫古人
之陳迹顧氣韻何如耳李謫仙欲學書於張長史長史
觀其筆力曰此書亦不必學大抵我輩自有胸中之妙
古人筆法固當徧參直至自成一家乃有真態世人於
遺山皆不以知書見許是豈效顰學者所能識哉

跋畫馬圖

韓幹馬多為後人臨摹形模雖在而百萬里掣電追風
神駿滅沒之氣則無矣此幅前馬天骨開張如虎如龍
負三疊之中半日百戰而其氣不少挫後馬馴順承銜
雙目後顧錦韉玉勒喜出天廐依依于人而有良德非
韓子絕筆他人不能為也某年月日某觀

跋陽關圖

畫至龍眠別立新意不襲朱碧故智水墨溶化而物物

意態自足陽關一圖去者有離鄉辭家之悲來者有觀
光歸國拜父兄見妻子之喜挽輅援車驅馬引駝祖餞
迎迓一貌一容紛紛擾擾恍然在京師門外塵坌羣動
中一漁父水邊垂釣悠然閒適前人以為得動中之靜
僕自垂髫聞有此圖今得一見清甫吾友宜珍藏之某
年月日某觀

跋謫仙泛舟圖

每觀畫工寫神大凡形模市井庸人則十似八九及遇

高人勝士雖加意容繪終不得其髣髴斯蓋卑凡之氣味相同則相得相合也亦易中人以下不可以語上也謫仙泛舟圖世固多本寶之主事此幅頗有高風絕塵之態定非庸工之所作也

跋杜莘老畫赤壁圖

赤壁圖少見絕筆士大夫以道德勲業而不屑為畫工曾次塵俗淺陋而不能為惟高人勝士不得志於世時一游戲能盡其妙莘老前身無乃不能相從二客之一

耶

跋李伯時孝經圖

龍眠寫人物不惟工畫者不能及雖造物之巧亦不易
若是之奇偉也雖經臨摹終可珍愛

跋賀真畫

賀真之畫元氣淋漓學李營丘寒峭瘦勁學許道寧雖
不見收于神妙能之九列而徽宗題其端蓋可愛而不
可忽其亦商訓周會李茂之流未能絕俗耳年月日紫

山題

又

士大夫之畫如寫草字元氣淋漓求渾全而遺細密畫
工則不然守規導矩拳拳然如三日新婦專事細密而
無渾全之氣賀真畫巖樹蒼老固陰沍寒與夫野橋平
遠塞門隱見胸次自得之渾全殿閣界畫近林梢際畫
細密功夫之巧置之能品可也年月某觀

跋姚安仁畫山水卷

姚安仁畫謂之名筆則不情謂之畫工則太刻細密中
得閒遠趣所謂以俗為雅者也

跋界畫畫語

界畫在畫學自為一科然不多見無乃非畫史之高致
而不屑為也抑亦難工而學者寡也繪事寫真須當對
照范寬住終南山十有九年蓋他人之筆不足憑也乃
知雄樓傑閣層臺危榭一木一甃自有馴度惟帝王家
所有非白屋寒士可得而窺雖老於巧慢工於梓匠亦

不能盡其巧况畫史哉嚮於長春道宮見玉帝觀魚橫披今觀此圖緻密大同而華麗過之武安胡某觀題

跋李文靖公傳後

竊嘗誦老聃之言吾所以大患者為吾有身也及吾無身吾有何患真名言也人心本無憂患纔有此身憂患叢至所謂身之患者饑渴寒凍疾痛勞苦耳目口鼻四肢百骸之欲一有不遂皆為心病外而至於養父母榮妻子庇九族高宮室廣田宅子女玉帛聲色輕肥之欲

不可勝計過此一間者又有為學進級功業名譽者著書立言焦思勞神死而後已然則此身一日全存諸患一日不息其嗜欲深者雖尸骸僵息魂魄游散人化而為貪厲為虎豹豺狼為佞鬼久久不泯然則身為心患豈虛言哉故顏子簞食瓢飲破瓦陋巷而此心之樂未嘗少奪孔子許之以好學者正謂此耳不知今之為學所學者何事去聖人之學不亦遠乎冬一日讀李文靖公傳見公淡然無欲因以書此

銘

滴漏銘

有序

惟皇踐阼之元祀分天下而為十路置宣撫使以大
名懷孟衛輝相磁邢洺實中夏之腹心可擇望崇位
重者鎮撫之特命內相左丞張公益焉公來治魏草
舊弊立新政布宣教條姦吏薄俗不嚴而畏不懲而
勸曾未數月民安事簡公庭清肅閒無告許聽斷之
聲退食燕居申申天天思及日月星辰唐帝之所以

精勤則之者蓋以民用天時以生活興作晏息順之則吉逆之則凶故曰百工惟時撫于五辰庶績其凝嘗觀周官大而六卿細而百執事至於發一號施一令伐一木制一器無非取於天時者故有書以推其畧刻有器以占其常變成法一定萬事永賴但因之由之習為耳目之常不知其為功也不知其為政之所當先也國朝撫諸夏幾五十年司天有官歷像未完是以挈壺無氏為可愧也命藝人郭若恩求諸古

制而製成之門士胡某識而銘之銘曰

天地之大疇能度之日月之行疇能窮之思古哲王德
符兩儀智周萬物冥然而思寅寅寅餞仰瞻俯推竹之
以管土之以圭筭數象厯玉衡璿璣測遠如邇窮高如
卑如指諸掌不差毫絲不先而速不後而遲暑寒晝夜
璣衡我持朮胸薄蝕數無我違民用以生歲月日時百
工庶績以成以熙萬事永賴大功巍巍成法一出視之
易為爰究其理伊誰其智職非其人道亦廢墮執一固守

恪循矩規惡知天道與時推移神州陸沉百年於茲劫
火一燎乃并棄遺動作宴息醉昏夢迷公來治魏政平
訟稀吏畏其民改前之非民服其仁不忍詐欺大舉廢
典後先合宜挈壺有氏能自得師弗緩弗棘靡傾靡欹
溶溶沄沄約其增虧晝夜百刻與天同機魏人聞知如
堵來窺魏人有言至而可期魏人有言我公無歸我公
之恩如漏之滋我公之信如刻之麗其直如矢我公之
威其容如壺我公之慈趨時興息指南元龜願壽我公

福祿如茨大書深刻識以銘詩

菽水堂銘

婦德貞母訓慈冰蘖苦守一兒登上壽髮半絲享祿養
逢嘉時五福備乘孝思名世士端影詞欽盛德為歌詩
神報施公無私

扇銘

去溽暑如酷吏邀清風似故人洗熱中於俗士解蘊結
於斯民養正氣以周德挺直公以秉鈞順秋冬而藏智

應春夏而施仁惟出處之中節能遠害以全身

濟寧座右銘

公勤廉幹百事皆辦私怠貪懦百事皆亂事辦名榮心
廣體平事亂無成身辱心驚自警自銘擇善而行

贊

東坡贊

東夷飛揚西戎陸梁時議歲幣龔為故常豈無良策雖
柔必強百未一施擯死南荒孰圖公像野夫冠裳公豈

野人與世相忘鐵龍橫膝雅志莫量緒餘土苴雲漢奎章死不可泯文正忠剛魂兮來歸瘴海茫茫

此畫極高蓋臨李龍眠之寫真也東坡之文章志略具在方冊後世可得而見高風絕塵之資不可得而髣髴得見此像亦足以起敬起慕發英氣而洗凡鄙仁卿當寶藏之胡某盥手書

王西溪畫贊

不吐艱深言不為卓越行臨深履危悉歸之平易用舍

行藏一安於義命無城府而人不忍欺不崖岸而人莫
不敬氣分四時感春也多士有九德得寬也盛樂易百
年與物無競

欽定四庫全書

紫山大全集卷十五

元 胡祇遹 撰

碑

懷遠大將軍彰德路達魯噶齊揚珠台公德

政去思碑

武勇可以折強暴而不能得匹夫匹婦之心權謀計數
可以欺天下而信不孚于豚魚此無他以力不以德以
詐不以誠也惟德可以服萬世而動天地惟誠可以感

冥頑而格鬼神之情皇威憑帝力禍福生殺自我
手繼以詭譎違道干譽糾結姦黠欺世盜名取口稱張
虛美立生祠樹豐碑不為少矣若此者在律為嚴禁何
足尚哉惟惠政實德遺愛去思使人愈久而愈不能忘
銘刻人心者為可尚已此古之所謂循吏者也彰德路
達魯噶齊揚珠台公承祖考世爵監臨本郡九年至
元壬辰讓位于其叔未幾御史臺上聞陞嘉議大夫山
東東西道肅政廉訪使士聞而榮之既適任邦人懷慕

不已礪石狀績乞言于不肖頌公之德美歌詠于無窮
以厚薄俗以勸來者噫不惟今鮮斯人求之于古亦不
多得謹按公到任至移官歲時伏臘人心樂為之歡慶
者枚菓升酒不入于門及其館穀貴人延接賓友豐腆
勤厚傾貲倒廩而不吝惜聽訟詳審不大聲色情偽既
明諄諄開悟使人愧服悔過而退吏或不法惟賊私不
貸公罪則以情恕之同仕官太過不及懷私相干犯亦
寬容而禮貌之喜怒不形于色相愛結歡三年不改易

無一言之相謗訕士大夫之年高德幼樂道忘勢以師
禮敬事之至元二十二年夏旱齋沐徒跣凡可禱祀無
遠邇致誠竭虔不三日甘澍霑足是歲大熟鎮南王駐
汴以事趨謁路值民車千餘曝炙于火雲赤日人牛困
暍不敢進退公即白王放歸二十七年姦臣橫暴分遣
惡黨禍毒天下以追徵逋欠為名所至凶殘百至雖漢
唐酷吏之不為者盡其毒螫死者相望所在有司股慄
屏息而不敢言亦反有助惡為姦以肥其家者彰德例

被其害公抗直不從哀訴於上一郡獲免梁王往撫西南夷供奉不擾而辦鄰郡疑獄凡委公推決者無異辭皆得平實生長富貴不見豪習書翰得法無事則觀書鼓琴以學校養才之地釋奠釋菜身先屬吏祭器按圖命工補完精緻以月俸買書千卷入府學萬卷堂嗚呼公之德政此其大畧也若夫以州郡不得展驥足為霖雨為舟楫者又未易言也謹因民之深愛而為之頌曰
民無愆罪生瑕玼民無鬪訟牽致之片言可決留歲時

以緇為白白為緇瘠民枉法肥我私汙濁苛虐相承師
人民疾怒難怨咨澳忍無恥如韋脂有人於此異於斯
羣蒿挺出青松枝鳳凰寧與雞同峙鷓鴣豈顧腐鼠鴟
清廟玉瓚朱絃絲豈弟樂易仁且慈九年惠政雨露滋
撫摩黎庶母護兒嗚呼宜乎碑去思嗚呼宜乎碑去
思

潞城縣尹吳公去思碑

至元十三年秋八月巡按平陽過潞州一人持狀來前

將謂屈抑控訟以吏詢所欲言則曰某潞城編民身無
冤訴前路尹吳君去任今九年矣遺愛民不能忘在政
績彰彰可舉偕衆而議吾儕小人蒙吳尹德政銘諸
心者死不可廁此身百年誰其知之曷若文石以傳不
朽使吾賢尹之善勸來者以名後世吾鄉感恩戴德報
謝忠厚之風諭子孫以及隣邑且激濁揚清使君之職
分也好善疾惡使君之天資也故甘冒干浼之罪敢以
狀聞願以誌石之言為請聽其言而納其狀竊自喜歎

我朝官制自中統建元頗慎推擇州縣之寄尚或非其人秩未滿而為土人告訐者十三四幸免者半無毀無譽者十一二去任將十年使人思慕紀石是豈聲音笑貌曲邀橫結之所能致哉是人也雖不熟其平昔以輿情為可信漢史傳循吏而不傳能吏吾言其可以已乎尹名讓字某銅鞮人飾吏事以儒術勤恪豈弟胥吏有過諄諄諭悟不嚴而化公家貨易諸物錙銖之價手自及民不為姦蠹所欺行野訓農星言風駕欵曲周至不

急不徐趨事赴功勞而不怨家僮馬食民禾痛繩而倍
酬其直豪族強宗侵漁細民者屏氣束手庭無滯訟剖
決如流終考事無巨細行信板以示告村落無吠犬里
胥之警去官之日裘馬書冊還家一無毫髮攜挈潞尹
之政此其大畧也至於一言之可取一事之可書具在
案牘異日當史筆傳循吏者自有所取而詳言之耳孔
子曰聖人吾不得而見之矣得見有恒者斯可矣以有
恒視聖人相去奚啻天壤吾夫子愛而弗棄者人之為

善恒久而不已為賢為聖將有日矣貪暴邪枉中而如
吳尹者亦罕矣推是心以往治一州撫一郡恒久而不
易其德業豈易量哉若夫矜小慧忘遠大患失苟祿而
為衰老務得之氣血所移不徒為是石之羞亦何以面
潞人吾之所信者潞人之言潞尹之政已往未來者吾
不知之矣

霍僉事世德碑銘

人能種德積善福祿來報不在其身必在子孫天理昭

昭信不可誣故視人之所為而必知其有後觀後人之
富貴利達則知祖考之平日前人翊子孫以高大門閭
者亦豈妄自矜負言猶在耳而徵應隨至豈虛言哉今
于霍氏見之矣僉山東東西道提刑按察司事奉訓霍
公改葬曾祖考三世于某所以不肖同仕分義之故狀
世德以墓碑求銘詞霍氏世為唐山人高祖以兵亂失
家譜諱字後世無傳焉曾考嘗監本縣稅祖諱嵩以法
律紫牘精明詳審為邢州孔目官郡守性褊急以喜怒

愛憎決事公抱案與守辨正是非屈直雖臨以盛怒不
懼不屈雍雍容容辭盡理到多所平反恐日久積忤守
意年甫四十托事勇退慕黃老養真修煉之術道家所
謂洞天福地歷歷游覽異人仙侶日相從游遂得其法
一日兵亂衆皆驚惶逃死無所公笑謂人曰我當屍解
仙去矣遂獨飲大醉而逝時年七十有二月餘兵去子
孫易棺改葬容貌如生咸驚異之至今鄉里耆舊能道
其始末考諱珪字子璋登律科第以親老永侍不仕宦

者十七年父既仙去奉母夫人王氏避兵裕州帥府聞其材辟充幕官干戈擾攘文移如織使者旁午公隨事應變剖決如流雍容辦集若無事焉事有疑難衆莫能決者一言裁處人情時宜無不允當衆皆嘆服每按大獄悉聰明致忠愛全活者甚衆城陷母歿兵亂定還鄉里至南肥舊帥府屬吏張君玉輩留挽因家焉未中年誓不復仕閉門以經史自娛雖里閭罕識其面生理蕭條怡然泰然不恤也邦人以素學專門願以子孫樞衣

受業堅拒不納但勸以孝弟讀書一時官吏士庶莫不
師尊之每以疑事咨請欵曲立決歲甲寅五月七日以
病終于正寢享年六十有幾妣范氏廣宗名家婦德母
儀勤儉慈愛事舅姑盡孝事夫以敬順至元丁丑正月
九日壽終享年八十有四四子長曰駢牛次曰儉德次
曰仙郎次曰肅郎即奉訓公也年十六丁外艱哀毀柴
立服闋以母老家貧不暇擇祿降志辱身由縣吏而州
州陞府府保貢于部用監察御史以公廉薦補憲臺掾

轉主宣徽院事至元丁丑姦邪用事剛正廉介不容于
朝然無罪指謫議以遐荒遷注改受安慶路總管府判
官明年春行省奏南選升降不公就陞鎮江路總管府治中
是歲秋改充杭州總管府治中明年冬改授揚州總管
府治中未之任改同知兩浙總市舶司事時權宮阿哈瑪
特子庫克新拜行省左丞專務掎克聚斂公稱疾求醫
閒居錢塘累蒙行臺行省保舉辟召皆不赴至元癸未
夏授奉訓大夫僉山東東西道提刑按察司事公剛正

廉介見可而進知難而退發身以吏成身以儒不十年而揚歷中外為賢大夫今才甫踰強仕前途豈易量也歷任在官政績俟千歲後神道一一具載茲故弗言當

銘曰

人生兩岐勞力勞智不農工商舍士奚事秦漢之交取人無藝一時豪傑隨世所貴如蕭如曹咸隱于吏業則刀筆志則仁義霍氏一門祖孫三世守其業蕭曹之志偉歟奉訓剛正嚴厲許身古人脫畧時輩詩書箕裘

糞土財利入仕十年揚歷中外在清流中又作涇渭御
史臨民親愛而畏永言孝思罔敢失墜高門之言炎炎
奕奕吉卜先塋大碑深隧種德增光有隆無替

張彥明世德碑銘

公名炤字彥明為濟南人祖諱全妣韓氏考諱信妣李
氏呂氏兩世治生商賈累資富貴鄉里貧不給者出有
餘以周惠之稱貸而不能償者悉毀其券歲壬辰兵荒
民乏食發私廩起餓殍賴以全活者不可勝計公幼業

儒以科舉進士之路廢改習吏事起身濟南總府掾廉
畏謹幹考功上計十年無敗失以勞能升本府從事歲
己未赴壽陽行省會計出入積年錢穀陳訴不允銀一
十萬五千兩悉得開除貧富貴賤免重徵之苦民用不
擾中統建元立中書省省掾難其人公首膺選擢掌邊
防幾密就遷左司提控案牘四年出為山東東路大都
督府員外郎未幾改充山東東路廉訪府兼轉運使司
叅議歲終考課最諸路至元二年宣命金符濟南路諸

軍鄂勒總管秩滿除陝西五路西蜀四川行中書省左
右司員外郎八年官奉訓大夫知兗州事時春夏不雨
二麥將槁吏民闔境禱公入境而雨幾二尺是歲大熟
屬縣黠吏扼持官府侵讐細民黷緣為姦利察知其尤
禁暴者痛繩而除其名羣邪為之屏息二吏赴提刑司
訴寃者老七百人繼狀申明知州公明斷為民除害此
二人誣飾虛妄不可聽願將若輩投諸水火無憾也二
人者逃匿不知所在瓜代克人刻石頌德十一年四月

改授淮西等路行中書省左右司郎中方大兵渡江攻瓜州鎮江守困揚州師百餘萬比炎方悉平凡再閱歲調度糧運供給器械有備無闕晝畫竒計為多十三年揚州主將李庭芝棄城遁去餘衆據城未下公不避矢石直抵隍池諭以廢興衆寡強弱形勢奏諮議者四人出城從公詣軍門定約降期三日朱制置以城降乘勢草檄傳布淮東未下諸郡高郵真通滁相繼歛服江南平丞相奏羣臣之功蒙旌賞錦衣鞍勒宣命金虎符官加大

中大夫揚州路總管府達嚕噶齊商議行中書省事
方甫定人心反側未安揚州立省府又當南北津要公
以強明精幹謹慎小心部大繁劇安集新附官府復治
閭里以安十六年改授鎮江路總管府達嚕噶齊未半
歲以疾辭得請還家買書八萬卷以歸以萬卷送濟南
府學以作養學者居閒五年怡然自得若將終身焉二
十二年起受東昌路總管年始六十矣老于為政吏民
畏信愛慕不大聲色而優游臥治朝廷行且圖任舊人

共政比秩滿邦人雖欲借寇恐不得矣夫人某氏某氏子男若干某某女若干某某適某人二弟曰煥將仕佐郎膠鹽司副使曰耀將仕郎河南等路提舉規措所事猶子四人曰時中從仕郎秦州鹽使司同提舉煥之子也曰執中嘉祥簿兼尉耀之子也餘幼業儒至元丙戌春正月七日以狀來曰先塋旌紀世德前二十年濟南路提舉學校官高翊序銘于石矣敢援古人第二碑之例為請庶幾吾子吾孫知吾家積德之漸以有今日恪

慎克孝光紹先業而不敢失墜也謹因來狀序而銘之
銘曰

苦寒微兮甘富貴古到今兮情一致才不進兮時不利
老凍餓兮賤無位偉張侯兮材拔萃孝父母兮友昆季
不師友兮能自勵奮青雲兮起平地日千里兮進無退
名日隆兮志日遂光祖考兮福來裔起懦夫兮發奇氣
參大政兮決大議坐廟朝兮歷中外者指使兮如壯銳
總大郡兮但臥治起孝思兮封墓隧銘兩碑兮傳永世

示後人兮母失墜

成安鄭氏世德之碑

奉議大夫知磁州事兼知本州鄂勒事鄭公以書來曰
先人棄諸孤十年于茲矣每以封樹未隆旌紀不石追
慕哀痛得罪於天地鬼神夫復何言謹卜以至元十七
年春二月二十有五日祔葬於成安縣歸義鄉郭孟里
之先塋誠得吾友讓著生平之事業刻之貞石昭示來
裔庶幾少舒積年愧怍之恨謹按來狀序而銘之鄭氏

自奉議公之祖考始居成安遂占籍為縣人考諱璧字君章幼孤養於姊夫張氏為兒不好弄成童有立志以儒為可學業進士舉克自勤苦寒不鑪暑不扇深夜而寢鷄未鳴而起若是者有年業成將射策於有司貞祐河朔兵亂不能成其志金主去燕走梁以魏相為邊陲元帥完顏惟宏握兵開府於林慮固巖邑以自守招徠流竄府州邑之可立者立之才能有用者擢用之成安令薛公文卿久知公才名推擇為縣功曹未幾薛陞元

帥府軍民都彈壓薦公廉慎幹局改充元帥府掾史既而帥府以孤軍不能立府事廢而官吏散亡公以天時人事推度其疆弱廢興以定去就不可復南挺身還鄉里依元帥郭侯智說以收合成安十餘縣戶數萬口數十萬投歛內屬是時土寇紛拏妄自尊大奪攘虔劉互相勝負莫可適從公佐郭侯曉以天命示以逆順疆弱諭以禍福成敗疆暴為之受約束教條棄兵力農熙熙為樂郊公之力也有以乘時從風當自奮拔取高爵食

厚祿而問公者公曰人生富貴功名在致力於壯年豈
終歲後人所宜為也以儒術飾吏事豈余素心哉車下
澤而馬歛段不為鄉里所疾惡斯亦足矣乃角巾私第
不入官府以耆德年高浮沈鄉社鄉人尊敬問學如父
師愛慕如春雨冬日享年八十有三以至元七年冬十
月二十有八日無疾而逝娶張氏有賢行母儀婦常中
表為法慈順嫻睦外內無間言子男三人長曰愈字希
賢即奉議公也中統建元以德行才能選為中書省掾

秩未滿以隨朝辛苦之勞出為某州某官四五轉而至
某官遺愛善政在在去思功業日隆方興而未艾次曰
愿泰州提舉司知事次曰恕林州三務提領孫男九人
榮祖顯祖光祖紹祖繼祖慶祖敬祖孝祖安祖先民有
言曰人之積德積惡固不同其以福禍報施不在其身
必在子孫則一也公有德不耀有才不盡展年登上壽
子孫昌盛而篤生奉議公高門之慶豈非明效大驗歟
為子為孫者追孝於前人於光有耀又奚止如斯而已

耶宜為銘以歌之銘曰

無脛而馳無翼而飛有進無退翕受敷施以公之材詎
無可為委吏乘田能者恥之賢於堯舜黽勉卑微嗟嗟
此心庸人莫知公之處已聖人是師栖鸞於棘蟠螭於
泥不騫不翦自晦自怡屈久而伸三鳳飛輝孝哉奉議
德業日躋敷歷中外畫錦來歸松楸有光鬼神其依封
樹旌紀高塚豐碑百世不磷勒以銘詩

大元故懷遠大將軍彰德路達嚕噶齊揚珠白

公神道碑銘

公名納琳居準祖曰圖薩博多考曰圖爾哈徹爾巴圖爾
相承為太祖太宗圖爾哈飲水於班珠爾納蘇圖開創
同艱苦事定酬勲因其所居之山川蒙賜氏曰揚珠台圖
爾哈徹爾侍太上皇晝從射獵夜謹宿衛其族弟博囉
罕叛入太丑軍太上皇疑其有異志指天而誓曰臣以
死無二心遂奮不顧身殊死以戰大敗太丑軍滅博囉
罕上皇喜其忠貞許以土地人民辭不敢受曰俱非臣

所欲也臣宗族散落願托天威聚集之得四百餘家復
為大族太上皇四子以公隸錫喇大王位下西征留公
領本位諸局繼受令旨充本位下達嚕噶齊先帝龍飛
金符授彰德路達嚕噶齊以本位湯沐邑也未幾佩虎
符職如故誥詞曰以爾王室舊臣常著勤勩仍賜狐白
裘隨拜王命賜七寶大帶曰惟此可以佩金符是後繡
鞍珠服織錦海青烏恩光稠疊照映外內公以丁巳歲
夏四月到郡時適早解鞍而雨郡當南北衝要使者旁

午前政以送迎館穀多被譏謗督責公以累聖知識位望隆重過此走謁而去市井無一錢之擾強寇數輩大奴婢小奴婢者劫民財殺捕盜官而去人畏其凶強莫敢詰捕公嚴責有司立獲於衛州市申部下報公知其黨與連結恐不測起獄為民害戮首從七人民心遂安由是經歲外戶不閉無犬吠之警先帝南征詔所經官路限一里為營盤牧地歲己未今上六師南下公迎拜行營奏曰奪耕田而為營牧南方土壤易荒但長蒿蓬

荆棘無美草莫若使民樹藝五穀師行則牧馬振旅棄
餘則令民收獲軍民兩便上喜從之民復舊業得地萬
五千頃庚申建元上即位諸王議事於金帳惟公得與
上欲用公於廟堂以病辭諸路積年逋欠皆令見在戶
代償民不勝困乏奏蒙蠲免鄰郡亦賴以復我朝語言
精密典故極多唯公能盡其說曉其凡例雖居外郡以
時備顧問故多在京師凡大宴莫不與焉在郡十有二
年不置田宅戊辰得疾上遣醫賜藥不絕上一日宴百

官於萬歲山歡甚樂奏北事未寧公奏曰願陛下安不
忘危聲樂烏可以弭邊患上喜諭羣臣曰舊人故多無
如此人出嘉言者明年還郡是歲十一月初二日薨于
私第之正寢享年六十有三實至元六年也公忠清廉
介論事雍容悉理撫民寬仁不苛暴夫人蘇爾圖展氏
多爾沁氏子男五人長曰額呼克中書省斷事官次曰雅
圖噶侍從賢王立功西域次曰阿固岱剛毅沈雄未及
仕皆先公卒次曰伊爾圖仁厚重靜襲爵彰德路達魯噶

齊授懷遠大將軍有惠政民到今思之次曰伊爾布哈
恭敬謙和以侍從勤恪授直省舍人遷南京治中至元
二十九年以姪嘉議公讓職復承先業中順大夫彰德
路大達嚕噶齊孫男二人長曰超台剛烈有父風次曰
幹里襲爵九年讓歸于叔陞嘉議大夫山東東西道肅
政廉訪使去任民懷思之刻石頌德曾孫男一人幼未
名銘曰

北冥王氣開聖神鯤鵬際會乘風雲黑河飲水股肱臣

錫土命氏酬元勲揚珠台氏門望尊豐功茂烈多異人
英哉我公難等倫三朝眷顧蒙殊恩珠袍錦帶萬金珍
繡鞍海鵲白狐溫忠貞謹恪益檢身有隆無替光寵新
臨民惠政多寬仁安陽父老拜馬塵祝公調鼎宜千春
英靈一夕還星辰邦人追慕良悲辛壽爵不滿公忠勤
天報有子仍有孫孝讓高節薄夫敦才兼文武知經綸
萬里駿足今始伸州郡小試非要津為霖蘇旱活飢民
慶元千世長法法

大元故懷遠大將軍懷孟路達嚕噶齊兼諸軍

鄂勒蒙古公神道碑

太祖皇帝受天命臣萬方太宗皇帝繼體守文一新官制簡而不繁統之有宗內則一相宅百揆贊萬幾外立郡縣以承上接下郡縣之守令例以歸義效順者就為之仍選蒙古人一員鈐壓其上謂之達嚕噶齊守令以次咸聽命焉生民之休戚政治之美惡實係於達嚕噶齊之賢不肖彰德居十路之一又當南北之要衝朝廷

以公為能自呼圖克帳下扎薩克齊擢拜彰德路達嚕噶齊歲丙申之四月也時金亡才三年民始脫兵瘡痍者未起逃竄者未復居者猶未安禁網踈闊兵卒恃功不能無侵陵攘奪之暴雖城郭井市之間外戶或晝閉而不敢啓敞公解鞍泣政知民以是為苦即下令曰敢虐民者當以法繩之工賈居肆者各成其市門戶開朗安生樂業無驚疑恐懼為農者各安畎畝趨時力田無苟且荒怠苦汝者吾能訓導禁治之令下強暴者柔馴而

莫敢犯野耕途行坦坦熙熙始知有生之樂歲戊戌春
二月懷州守臣王榮叛太師國王命公討平之且有殄
殲之訓公對曰王師討逆脅從者猶當宥况無辜乎國
王嘉其言而從之王榮伏誅而闔境得免郡人壺漿香
火攀送號泣而不忍去後四十年改治河内百姓聞而
喜曰是全活我父母妻子親族姻婭舊使君也歲己亥
相衛蝗野無青草民乏食公訴告於執政大臣呼圖克
分軍儲糧五千石以起餓者用是民無流殍歲庚子至

癸卯四年大舉南伐所過官吏告病公以忠勤預備供給不置而民用不擾歲丁未淮漢諸城隨下隨叛民無所依者南北奔竄邊將土官爭掠以為功公以恩信招諭萬餘戶悉以為民三尺之童不遺也間歲比不登賦役督逼屋空十三四公命官四出告諭還業者復三年是歲招來萬七千戶歲戊申春正月輝州賊人朱葛結黨逆亂兵官乘釁欲彘緣縱濫公曰國家貴我富我委兵柄于我寄一郡之命于我將以我平寇耶以我為寇

耶不用汝輩妄自張皇賊不獲亂不平吾任其責即率
麾下以往獲賊三十八人於黑鹿山郡人安堵如故秋
毫無所犯歲己酉春三月賊人薛志全亂如前策而平
元戎察罕知公廉明寬仁每遇諸路解送死囚即委公
審問推情據法寬伸罪減前後不可計安陽農家得罪
於貴人責斷處女六名寄留而去至是將十年公申明
於貴官阿勒楚爾悉嫁為良庚戌夏旱公齋戒祈禱甘澍
沾足中統三年春李璫叛遣奸黨偽駙遠圖不軌東西

經數路官府莫能辨公發詰而服姦謀為之破散四年
旱禱雨而雨是年改授明威將軍中山府達嚕噶齊至
元七年遷河中府達嚕噶齊十一年春以勲舊老臣仁
政廉節所去見思佩金虎符超拜懷遠大將軍懷孟路
達嚕噶齊兼諸軍鄂勒二月二十有九日以疾薨於私
第之正寢享年七十有一公蒙古人小字蒙古巴爾父錫
巴爾母稜拉夫人六額齊濟徹辰伊蘇塔海趙氏蒙古
展子男七人淖海嘉議大夫准東道肅政廉訪使博囉

武畧將軍嵩州達嚕噶齊自筮仕知子民之方所至政
聲藹然去則民不能忘齊諾舒庫爾齊能以恭勤自律
扎瑪哈特穆爾奇塔特未仕和拉推勒早世女六人諤
都岱適大丞相忠武公之子右丞史侯阿什克適王宣差
博囉展適濟準提舉伊勒謹適黃頭百戶噶嚕迪適全
宣差小女兒適肖宣差男既葬之七年其子淖海等狀
公之德政以神道碑來請銘嗚呼歷觀古今之為政者貪
者必殘而廉者必仁如形聲影響之必然蓋貪則不足

不足則凡可以力取者雖以一已害天下不顧也廉則不苟得不苟得則雖一介之輕不義則不取也又安肯害物以益己哉公治彰德近四十年所居之室所食之田庇風雨取溫飽而已薨之日遺子孫者無別業餘財故能形而為政一以富安全活愛人利物為務方之漢唐廉吏循吏亦可以無愧若夫不學而不能為風俗移是之謂尤難在一時牧民之官當為第一流人銘曰
元武間氣篤生異人發強剛毅淵靖沈恂大藩名邦來

經來綸解鞍泣政無非至仁民始脫兵瘡痍吟呻煦摩
愛養時雨陽春悍將驕功侵陵賤貧德威惟畏悔過自
新市野雍熙強暴柔馴里詠途歌歡騰四鄰鄰人有言
孰匪我民惟彼相衛樂耕樂耘我無父母恩胡不均凶
逆好和貪殘鼓軍渠魁伏誅脅從獲伸律兵而還不囊
一緡吏感其廉咸知愛身民懷其惠如子慕親遺愛百
世豈惟茲晨宜其有子繼擁朝紳宜荷聖念錫名忠臣
邦人追思日見丰神墮淚而碑不在斯文

乾
隆
寶
印

欽定四庫全書

集部
紫山大全集卷十六
七六

詳校官庶吉士臣朱理

侍讀臣孫球覆勘

謄錄監生臣董誠

謄錄監生臣王人作

欽定四庫全書

紫山大全集卷十六

元 胡祇適 撰

碑

舒穆魯氏神道碑

天將以神武睿聖之君開基革命則必錫以智勇雄偉
之材為之將相成湯得阿衡而革夏武王獲尚父而翦
商秦得蒙恬白起漢得子房韓信視取萬方奠九有如
捲席破竹摧枯拉朽不勞力而定自是以降迄於今一

廢一興修短治亂雖不同而君臣際會股肱心膂莫不皆然我太祖皇帝起朔方入中夏不數歲而奄奠萬國攻堅平險伐謀破詭固出於神武睿知之獨斷而其陽開陰闔鼓雷霆之先聲虎搏鷹揚震風雲之餘勇者豈無人馬河山左界東際于海北首燕雲南抵淮漢摧鋒挫鏑聲實相應順則撫之逆則折之一戎衣而為我有者實太師穆呼里國王忠武之功也太師之貳將曰鎮國上將軍御史大夫舒穆魯公薨五十有五年公之嫡

曾孫良輔狀公之平生以神道之石來徵言謹序而銘
之公姓舒穆魯氏小字額森其先特爾格人仕遼世為大
官兵亂譜牒廢世次莫能考公幼穎悟未冠雄勇過人
以將家子弓槊鞍馬不習而能及長精通吏事契丹女
直兩朝語言風俗政治典故耳目習熟仕金為譯事未
幾以明辨廉幹遷西北路招討使幕官繼以軍功拜萬
夫長公請讓職於族兄章達納願以副貳自處金帝嘉
其遜悌友愛而從之今自道陵崩逆臣擅命乾綱解弛

宗室貴戚素無威柄重以宴安佚樂昇平日久平居無事口脂面藥軟媚如婦人女子一旦內亂遽起惶駭憂懼莫知所為我太祖提兵南下所過城邑從風而靡公歎曰天時人事上下相應金德衰矣事可知矣中擾而外潰吾以窮身孤軍其將疇依天命其在北乎逆天者不祥遂同族兄率所部之衆而歸太祖皇帝帝以公隸太師穆呼里國王帳下王適欲取東京兵駐臨潢高州以公為前鋒覘其虛實圖攻拔之策公倍道兼行距城

甚通道值新官留守來之任公襲殺之獲其章服誥命遣吏給報城守者曰新官至矣守城吏出迎即入公廨中聽事謬謂僚佐曰城樹以兵何也吏以邊聲對公曰吾新自朝廷來他郡寂無此音且俱不設備毋妄苦士民下令撤兵安以溫語老幼為之帖然潛遣使以告太師太師兵至不血刃而得一大郡口數十萬公之用兵可謂仁且智矣太祖南伐太師奏公知兵承制以為托和倫塞勒弼之副將軍事一決於公敵城之堅瑕人情

之向背目中所得莫能逃其算遂自北京幽薊益都大名皆下之以功歲乙亥五月特恩錫虎符拜鎮國上將軍以御史大夫提控諸路元帥府事是歲十月詔同左監軍王守玉偕來至闕勅自灤水東遼水西土地郡邑一聽公約束歲丁丑六師復南公帥諸將攻蠡州親執桴鼓為諸軍先以死報効殞於矢石之下時年四十有一嗚呼以公之才方之古良將不為過惟其忠於為國不有其躬置身於死地而不自惜竟以勇斃惜哉公天

資廉潔身後家無餘貲訓兵持賞罰甚平不以親戚而
屈法不以仇怨而沮功夫人三長曰蒙古氏次肖氏耶
律氏四子長曰察喇次曰轄克錫次曰博囉次曰琨察喇
轄克錫博囉蒙古氏所出也察喇剛直有父風發矢無
不中嘗一日射飛雉三十歲戊寅襲父貴從太師西征
取平陽太原隰吉岢嵐諸城歲丁亥從博囉國王攻益
都堅守不下力窮出降諸將以久拒命欲屠之察喇切
諫以殺降不吉國王從之闔城得以免死歲辛丑太宗

皇帝以察喇功臣子能繼立戰功授真定路達嚕噶齊
兼北京路達嚕噶齊歲癸卯享年四十有四卒於柳城轄
克錫不仕博囉志大而早世琨耶律氏所出勇力兼人
善射嘗知興中府後隱居不仕一女曰壽仙適遼王子
孫二人長曰庫嚕默氣質超邁剛正善弓矢承父職兼
尹興中府中統二年皇帝思念先朝舊臣有勲於我家
授黑軍總管三年平李璫亂以疾卒於漁陽享年四十
有三次曰彥文純厚孝友興中諸軍鄂勒長曾孫三十

餘人某某玄孫若干人良輔庫嚙默子也世父官銘曰
志士有言馬革裹屍不材擁腫壽考奚為維公天稟得
熊虎姿風際雲會貳我太師兵不師古有正有竒智信
仁勇左右具宜廓清寓縣傳檄可期猛不懼險忠以忘
危失我名將孰云不悲公乃夷然視殞如歸英名天壤
豹死留皮宜其有後若若累累世握兵柄益光前輝遼
陽之野灤水之湄大書深刻有豐者碑千秋萬古不磨
不隳過者斂衽如拜生儀死事一傳孰措其辭忠武一

諡子孫孝思太常太史視此銘詩

李隱者墓碑

中大夫同知福建道宣慰司事李侯狀其考妣之行踵
懇謁曰先人隱德百年不求聞遠不肖自膝下受教至
粗見成立承意先志溫清甘旨之養百未一遂風樹之
憾竟棄貌諸孤於今二十有一年矣先妣前此二載亦
以疾棄世以吉卜已得同窆惟是表封者無有石已罄
矣敢百拜以請謹按君諱聚世為安陽人謹厚有襟宇

完顏金未亡之二年歲次壬辰河南北兵荒人不地著
東平嚴侯檄君招集流散而撫安之居者寧竄移他鄉
者有所依賴不妄遷徙是時新獲生於兵隴畝關市外
內蕭然足食者十不二三君能出囊篋以周給衆皆感
戴畧無德色不責報償衆皆悅服長於生財不三數年
益致富有君與乃兄幼失怙恃兄以多疾父母憐之凡
可以娛悅其心者縱使為之因是不事家人生產毬鞠
博奕靡不精絕長年絕以遊戲為樂君委曲承順怡然

泰然課童僕負錢幣以供具兄稟賦躁急少不如意輒怒形於辭色甚則及於笞詈君敬畏卑遜承以和氣婉容必致其允若歡欣而後已兄後得風疾飲食湯藥必親嘗之首尾十年猶一日也配謝氏蘄黃元帥謝公之女也亦能恭順孝友敬夫事長如嚴舅姑性儉素不喜錦繡纂組惟以緝紉為務慈愛僮僕如子姪雖有大過諄諄而教口無惡言鄉黨鄰里事上教子必舉李氏夫婦以為法君享年八十至元六年十二月日以疾卒於

正寢夫人享年八十有三見其子同知福建道宣慰司
事以壽終至元戊子九月日同祔葬於安陽郭村之先
塋一子名才郎少中公也子妻王氏婦德母儀一如姑
德少中公之勲業見於某州去思碑效忠堂記茲不復
云孫男若干女若干銘曰

里仁而我亦仁未足多異民鮮而我獨能庶幾高致嗚
呼噫嘻教衰道微兄弟為讎相怨相尤父母俱存離析
乖分茲時茲辰而得斯人事兄如父敬嫂如母逢彼之

怒有順無忤孝弟之誠通於神明天報其德乃生賢息
懋建殊勲致身青雲晦久而彰宗族生光松檟千章豐
碑深藏繩繩繼繼百世其昌

故磁州安撫使李公神道碑銘

公諱平字平甫世為邯鄲人祖考皆隱於農公體貌魁
偉既冠喜交結豪俠輕財尚義氣貞祐兵亂金自燕走
汴河北不能有以隆慮險固可守命宗室惟弘為河北
宣撫使置司事擢公為磁州判官未幾陞本州刺史懷

遠大將軍歲庚辰宣撫司事廢無所依恃帥材勇三千人衆五萬口詣軍投身我朝太師國王承制授公輔上將軍滄源軍節度使行元帥府事佩金虎符雄鎮河朔壬辰春太師竒爾濟蘓奏奉朝命以公移潼關軍民千餘口於磁撫綏之前職如故庚子秋公以勲舊改本州安撫使逋逃復業者踵踵不絕是歲民乏食發倉粟千斛以給飢殍臨政正己率下不可干以私歲辛亥例罷宣撫司公高卧不起丙辰正月十日以疾卒於私第享

年六十有五祔葬於縣南文莊里先塋配許氏趙氏申氏丁氏康氏子男五長曰天祐襲爵再除磁州勸農使次曰天瑞滏陽行軍百戶次曰天祿鄂勒百戶次曰裕曰祚磁州稅使猶子德滏陽尉女二人長適行軍千戶王玉次適管匠達嚕嚕齊安祚孫男八長詢大都鈔庫副使次誼郁欽欽行軍百戶次成溫讓義公自致政燕居奉養豐腴賓客恒滿門秋冬携子弟遊獵春夏課童僕種藝鄉里榮之後三十有六年天祿求文士杜琪狀

公之德業持狀以墓碑來求銘敝邑武安磁之屬縣義
不可辭銘曰

世胄所起丈夫所恥不墜門閥一舉千里風虎雲龍神
授天啓將兵子民德威可紀赤舄虎符煌煌焯焯英嗣
賢孫世濟其美開國承家似公能幾遺愛流芳百世不
已太行巖巖渣泉瀰瀰銘碑永年夷山洄水

王晉卿父王隱士神道碑

奉訓大夫僉江東建康道提刑按察司事王可與奉監

察御史張之翰之手狀曰此先君生平之大畧願吾子
銘其墓碑敢再拜以請既唯命誦其辭玩其事而知其
人然後知古今天稟高邁力於為善者世不乏人特以
子孫之不肖友朋之不能文有國者不尚賢是以不得
褒美稱揚使後世泯沒無聞為可傷悼不寧唯是又因
以知為善則一而得名於後者多挾權處勢高明之徒
而不獲見稱者類皆無勢位側陋隱微之士于是而得
一賢子孫繼志述事不滅前人光廣其聲增其大業請

文於朋友請傳於國史得諡於太常刻之金石播之無窮可尚也夫公諱政世為上黨人靖康之亂徙相之臨漳祖庭父元皆潛德不耀妣李氏貞祐中金遷汴奉父母居陳之項城時衆以避兵失鄉井例不聊生公買田千頃因以致富仰食役力親依者如父母歲久不忍相舍去金亡北渡流離頓挫之際罄囊橐以濟貧乏親戚鄉里老幼因病難於徒步者車載以歸既復桑梓時移世變田園廬舍已為豪強之所有因餘貲以通有無再

致豐厚父年高游經喪亂以公之賢足以付託故不事
家人生產日招親友飲食歡笑道舊公能承意先志以
致其樂事繼母李氏尤孝謹母亦盡其慈愛雖鄉井姻
戚不知其為非所出也晚歲貨殖充足樂復於農耕田
鑿井相依者成市鄉人目之曰王氏井嘗戒其子可與
曰吾不幸生長亂離不得讀書以儒學起宗又不獲務
本力田晨昏具甘旨夏秋供賦役以循天吾不忍復置
汝於壟斷之間汝當力學以成吾志故於求師取友必

端必慎卒成其子為名士材大夫享年七十有一至元
七年五月二十有七日以疾卒於正寢娶呂氏婦德母
儀兩盡其道子一人即可與也孫男四人長曰默侍御
親軍都指揮使司令史餘幼未名至元甲戌二月日祔
葬於安陽成村之先塋禮也銘曰

積而能散以財發身所居成市以德致鄰無社無民而
有循吏之仁孝能養志慈能成子敬以擇師誠以接士
不經不史而得學道之旨究其端倪天姿粹美動靜語

默適義循理隆墓豐碑銘其可已百世千秋過者讀之
猶足以激浮薄而愧貪鄙

衛輝提領長官蕭公神道碑

公諱璘字文玉姓蕭氏其先祖圖薩拉世遼之貴族贈
奉國上將軍四世祖阿薩爾仕遼為羣牧使正隆中子
孫以屯戍遷清平之杏園營遂為清平人高祖竒拉爾
贈鎮國上將軍上騎都尉河南縣開國子妣耶律氏河
南縣太君曾祖栢德本贈輔國上將軍輕車都尉河南

縣開國伯妣耶律氏河南郡太君考德亨奉國上將軍
知彰德路總管府兼行軍總帥府事公警穎辨利玉色
揚休勇力騎射絕人能以禮自將不敢以富貴才美驕
人歲壬寅公年未弱冠奉國君異其不凡命提領本路
司縣事臨政明敏雖老姦巨猾亦不敢欺剖決如流事
無留滯奉國君知其可用未幾改授權知彰德路總管
府事南北要衝使者旁午事務殷繁代父兄之勞應期
會簿書之劇雖老於吏事者不能堪公處之裕如也遷

授新舊衛輝三州提領長官振領大綱簡而有要誠以御下三州之內屬吏效忠民用不擾暮歲後賦稅增而獄訟簡上計於郡為他州最時江表未下糧餉切忌民力不能支公輒立已券稱貸於富室以供其兵役故事得辦集而民不告病歲戊申南伐以材陞千夫長佩金符主將奇其軍功錫以名馬玄纁錦綺各有差用是知名諸軍上乎大理以扈從忠勤蒙寶劍之賜師還叙勞定功人將以為有不次之用以是年月遠疾卒時年三

十有二聞者莫不哀悼嗚呼公生而為貴公子畧無驕
奢淫佚之習挺身立事早能有成其賢於一時閱子
弟遠矣大勲異業其可量也哉惜乎天不假年遂以天
殞悲夫然而方諸恃財挾勢以墮志不自樹立不成一
事荒湛於裘馬酒色之娛雖康寧無事而獲上壽何足
貴哉夫人滿扎氏幽閒貞靜端莊雅重失儷以來能以
禮自防膏沐容飾屏絕不事子男一人名世傑有父風
釋褐唐州判官自幼孤以至成立皆母夫人教之力

也以至元七年某月日安厝於壑西北原豐安里又八
年以公之神道碑來請銘銘曰

魯莊之威儀扶藝智伯之陵人五賢才則高矣德無有
焉偉歟蕭公才兼二子以德將之世濟其美鵬翼垂天
一舉萬里豈其一疾而竟不起壯士聞之有淚如洗我
思蕭公虎視鷹揚劔鋒一揮前驅莫當宜其佩金符之
榮耀蒙寶刀之寵光一世之夫萬世之長骨朽名存公
為不亡

德興燕京太原人匠達嚕噶齊王公神道碑

公諱德真字濟準世為渾源人大父始遷隆興之豐利
考諱資榮妣史氏公生九歲而孤太祖皇帝提兵南下
敗金軍於野狐嶺得公喜其頭顱不凡命宮掖撫養之
三年通蒙古語言譯說辯利太祖出入提携之丁丑冬
太祖巡狩於圖拉河匠官史大使帥羣工懇訴於公
曰吾儕小人以絕食而殍者已十七八存者亦將垂死
微公其誰救之公即言於上凡所獲獵獸盡以給餓者

繼賜以牛羊又弛塔拉布哈松實之禁得采食用是困者起瘠者肥免於溝壑者不知其幾歲乙酉會同於布哈綽克察太祖以官制未備凡當職分者稱集賽以公漢人定名為奉御實與伊蘇巴爾塔布岱扎固刺台同列三人者貴官勲臣也軍國重事悉委任焉公知無不言竭忠盡瘁事關利病有犯無隱或至夜分敷陳於御榻下太祖喜其忠直多允其奏又命公兼掌二皇后宮政后撫之如子嘗謂所親曰此吾之竒凌扣也丁亥春正

月太祖征西夏嚴李王誅之怒其負固不服欲屠其城
羣臣莫敢言公諫曰犯順效逆者既已就戮民各為其
主百萬之罪宜活陛下同仁一視子憐萬國非敵百姓
也幸寬天誅太祖悅悟遂赦之上欲伐鞏公曰西夏已
平鞏不足拔不必勞師用衆臣請諭之禍福遂持節以
往鞏開門出降歲庚寅太宗皇帝以公先朝舊臣服勞
王家不欲勞以煩劇賜公金符授德興燕京工匠達魯
噶齊歲壬辰蘇布特圍南京城守崔立遣使納款情偽

未可知公與來使同往立出降時有詔命公集諸匠一
日應募者數千適歲飢人相食公出已財糧以食之脫
死者不可計率諸匠北來至太原較其伎藝率多畏死
冒充而實不能者公亦不之罪諭以溫語示以程法積
以日月後皆為良工歲丁酉後除德興燕京太原人匠
達嚕噶齊中書耶律公從容謂公曰公啓運勲舊宜侯牧
一路不然公且留中相與同心協力匡輔聖政公力辭
曰僕幼蒙國恩撫養禁掖出入行陣粗有歲年大政高

位實非敢居中書君知不可留乃止六皇后攝政執政者擬公為西京等路廉訪使先帝南征大臣又奏公可為平陽太原等路廉訪使皆以疾辭一日召諸子曰余以垂髫野豎被日月之光沾雨露之澤歷仕五朝而無纖芥之補今老矣不可厚積官謗遂上章告老朝廷憐公耆舊俾其子孫襲爵既得請燕居於太原之私第往來別業山水間讀書學養生十有餘年嫁妻三人放驅二十人焚毀諸人負錢券二百餘張至元九年八月甲午

以壽終於正寢享年七十有一夫人四李氏張氏劉氏
呼嚕氏子男六人什喇哈斯張出也次曰納延次曰居
實劉出也次曰曩嘉特次曰居廉居安女四人某適某
次曰某適某人孫男八人某以某年月日葬於某里銘
曰

得君已久畏怯莫前諫聽計從顧忌弗言太祖天威百
王凜然公之遭際未閱幾年活百萬命忠懇迴天扈從
兩朝雨雪戈鋌武成告廟定功後先三五爵烜赫聯

翩何力之有願處卑偏緝熙百工曲盡精專優游常職
百務棄捐晚年知書聞善拳拳恬淡虛靜吐納希仙壽
七十一正寢歸全生平手奏格言成編世雖莫聞後當
有傳考始要終玉潤金堅汾水之湄東社之原喬木豐
碑高塚新阡陵移谷變不崩不穿

舒穆魯某神道碑

侯諱某字某姓舒穆魯氏其先遠貴族家於遼碣間高祖
阿薩爾仕為羣牧使正隆中子孫以屯戍遷清平之杏

園營遂占籍焉曾祖奇拉爾妣耶律氏祖栢德本妣耶律氏父圖薩拉妣耶律氏歲丙午行省太師統諸道兵破大名侯遂隸帳下拜館陶招撫使俄遷東平大名招撫使元帥左監軍留事東平行臺嚴公以取磁州功遂兼知州事復以取林州功遷同知彭德府總管事丁亥四月收復彰德陞林州彰德府事某年月日以事死於燕邦人悲之年五十有八夫人若干人子男若干人女若干人孫男若干人女若干人某年月日卜葬於某所

某原銘曰

金亡河朔兵塵紅天威張皇開四封網羅豪俊圖巨功
割疆自立從羣雄趙南衛北實要衝十室九罄糜銘鋒
失侯得將如萍蓬以暴易暴承債蹤維侯孤騫逆長風
提携猛將來羆熊撫摩痲瘵濡疲瘡翦夷棘莽成桑農
黃金臺高心益恭幕賓濟濟人中龍歲時朝覲或會同
高壓羣牧聲隆隆蒲鞭仁慈出天衷公私倉廩俱阜豐
誘民以善民易從一緘幽恨埋闕宮英魂夜半號蒼穹

卷十六
吁嗟大福潛大凶高鳥既盡藏良弓太行西峙漳水東
邦人思侯哀無窮

故鎮國上將軍總管砲水手軍匠元帥府清州

張侯神道碑銘

天運人事否極則泰亂極則治理固然爾然而開泰定
亂洗妖氛服羣雄千戰千勝一清四海乘時佐命立萬
世太平之基苟非勇可以敵萬人智可以伐羣謀矯矯
烈烈出羣命世之大才則不能也清河元帥砲手張侯

當我朝開創智名勇功是諸大將之一也侯世為清州人諱榮體貌雄偉智勇超邁金主走汴歲次甲戌侯以武勇選守戍燕都太祖皇帝整師南下侯揆以天時人事率衆同明安大保詣軍門請受命太祖皇帝壯其材志錫虎符授懷遠大將軍元帥左監軍侯感荷殊遇誓効死為國立功業每戰身先將校同勞苦士卒亦樂為之用戰勝攻取所向無敵首平河間下大名繼收東平濟南益都江郡聲日益振太祖皇帝征回鶻六師至莫

蘭河流漸湍急衆莫能前侯立縛戰艦百艘全師畢渡
直抵城下未合圍侯列樹危竿飛石石下如雨城不能
堅回鶻請降由是忻都欽察諸國接踵納款西戎遂平
論功最諸軍未幾扈從取河西河西負固堅守侯如前
攻城破衆潰以功陞鎮國上將軍總管砲水手軍匠元
帥拔關右五路攻鳳翔勇不顧身砲傷髀近侍尚醫勞
問調護腹背相望疾愈歲辛卯從太上皇由金昌取均
州諸城明年壬辰以王事終於軍子忠仁襲爵勇畧如

父從濶出太子進討兩淮經畧江漢取川蜀歲不家食
戊午先皇帝西征師次釣魚以將家子仍舊職拔為上
將冒險先驅所過戰功居多聖上即祚志在平南選將
居邊被命戍守均房領漢軍萬戶丁卯二月以疾卒於
大都之行館孫男君佐承職散官如前仍兼利津海道
糧運管軍萬戶用兵臨政同符祖考君佐以某年某月
某日遷葬於鎮定縣之某村從吉卜也既葬以神道碑
來請銘銘曰

乾坤草昧昌運開乘時佐命須雄才龍拏虎搏岳麓推
除凶翦暴如蒿萊喑鳴叱咤生風雷廓清四海無纖埃
戰功稠疊寵渥偕虎符錦綬光昭回忠武壯節高崔嵬
遺恩餘慶貽後來將門出將真將才子孫襲爵皆英哉
鐵槍可埋名不埋豐碑高塚西山隈彤弓家廟齊雲臺

大元故元帥左都監曲周縣令杜公神道碑銘

公諱泉其先潞人高祖而上徙居廣平之曲梁祖榮善
植生產年逾七十優游以壽終考貴承先業增崇生息

遂以財雄鄉里積而不居推以濟不足人多德之交游
豪貴日滿門頗樂鷹犬中壽而殞公資稟俊偉幼異凡
兒宗族有識者曰此子必亢吾宗既長讀書略通大義
遇事力行卓卓自持歲庚辰我師南下公帥衆詣軍門
降太祖皇帝姪王承制封拜嘉其義勇即署行軍提控
以隸大將索和爾平山東下東平舍利等諸柵前鋒殿
後勇冠諸軍卒己秋七月征河東破青龍石家等堡越
河中收撫關右定西夏招懷攻擊所向無敵公之力為

多壬午三月還師秋從索和爾北拜王於行帳優蒙賞
慰佩金符充曲周丞兼管軍民畏威慕德不嚴而化甲
申夏五月東山草寇奄至城下所過燒毀室廬驅掠人
畜公奮身衛衆手殺數十人賊退門吏白令旨金符為
賊盜去帥猛士百人邀其歸路殄殲而還由是姦宄破
膽不復侵軼戊子春二月王懋成績復賜令旨金符光
寵之升爵昭勇大將軍官曲周元帥監左都縣職如故
辛卯冬征河南克鈞州平汴差次戰功諸將擢焉歲乙

未武成大定皇帝受羣臣朝割茅土以賜勲親邢洺等
四州隸右壁萬戶公任職如舊歲庚子總府薦公勲舊
升曲周令立市勸耕賑乏問疾不四三年視諸邑為樂
土癸卯秋八月朔遘疾越三日終於私第之正寢春秋
五十有四總府贈金以葬邑人路祭巷哭夫人王氏出
衣冠盛族女則母儀內外慕效再娶趙氏侯氏俱名家
淑靖懿恭子男六人海源淵珪演季曰弘毅海襲爵治
大縣所在有聲去則民思之今任廣平路總管府判官

源邢洺路鄂勒提領淵忠顯校尉出軍總把兼萬戶府都鎮撫軍功將畧能世其家孫男十二人世傑世英國用國才君輔雲甫餘幼未名公歿後四十年至元壬午春正月十二日安厝於新安鄉鄭晏里之新塋從吉卜也公生長兵革鞍馬間不資教養而踐履篤至事二兄極友愛樂赴人之急難惟義所在禍患不恤也嘗積粟數千歲凶則借貸不責償初壬辰平河南迴俘以百餘口父子兄弟夫婦去就聚散之可哀憫者多縱遣之仍

為經紀其生理握兵臨陣不妄誅戮一旦臨民專務撫
養齊家教子不積貨財此人之所尤難者洺水簿林慮
徐異狀公之平生也如是總判公奉狀以神道碑來請
銘銘曰

勇不嗜殺息亂底寧惠而知政煦煦無聲惜也跼驥足
於百里匣鏌鋦於發矟壽不稱德歿有餘馨用不盡才
志其可平天其或者流於既濫之餘發於持柄之末積
厚報於賢嗣享安富而居高榮出總大府子為名卿蘭

牙玉屑繼繼繩繩孝思起塚如崗如陵孝思刻石既堅
既貞使過者拜手拊碑而歎曰有是父而有是子父種
德於子子揚名於父斯言也足為千秋百世之銘

同知石州事高公神道碑

公諱岡字陟夫姓高氏石州寧鄉三聖里人世世孝弟
力農以德以勤遂以土田緡錢雄鄉里考諱順妣郭氏
謹厚勞苦增廣前業以公天資不凡不類農家兒夫婦
相與謀曰教子訓孫固當不易世然是子終不可以服

田畝即今治平無事國家以儒學官人苟使之從師讀書必能光大吾聞出幽谷而遷喬木不愈於以畎畝之不易為憂乎故公八歲入小學十六而知為學之方自是日藏月修六經外傳及羣書釋老二書一一涉獵連射策於有司不合時好不中第泰和八年入粟補官監寧鄉酒稅事我朝兵南公帥衆降太師國王承制授寧鄉尉外戶不閉累歲無犬吠之警歲戊子縣陞為州就陞軍判歲庚申中統建元太原總管府申河東道宣撫

司薦改授同知石州事公自等級積官知民情識時務
老於吏事三年之內優游卧治不嚴而政舉五年二月
四日以壽終於私第之正寢享年六十有九聞者莫不
流涕夫人李氏生子男三人孟曰鳳仲曰彥英皆早卒
季曰彥萃襲爵今累官承務郎同知磁州事一女適平
陽太原路巡監視運官陳政再娶馮氏無子再娶楊氏
生二女長適張暉次適郭邦寧孫男四瓚璿琬僧奴瓚
圭家事璿監本州酒稅琬本州孔目官僧奴尚幼孫女

四人曾孫一十五人以某年某月某日祔葬於三聖里
之先塋彥萃狀公之生平請銘其墓碑銘曰

學言有知為兒不嬉卓然秉彝晨昏趨庭自持自矜暮
史朝經積而不居克諧時須起身亨衢殷墟麥秋挺身
歸周邦人咸庠州縣翺翔春露秋霜白首馮唐中統飛
龍選實論功榮拜新封載飛載揚桑梓有光死生故鄉
子孫繩繩繡衣珠璣克廣家聲故園故山松柏芄蘭神
靈安安豐碑差峩我銘可歌百世不廟

王忠武墓碑銘

朝列大夫尚書戶部侍郎王桓桓母弟奉政大夫淮東
道提刑按察司副使構同狀西來曰我先人忠義事君
棄藐諸孤八年於茲墓木已拱而經紀寂寥敢以再拜
墓銘為請謹按張澤狀公之德業曰公諱公淵字潤甫
其先秦將翦之苗裔也世為濰之北海人七世祖徙居
東平考鐸官忠顯校尉妣杜氏大父瑀正隆五年登進
士第官奉訓大夫今妣范氏及其內皆文正公之後曾

大父尚智金初登進士第官朝散大夫妣崔氏高氏范氏興家五年東平內屬三兄避兵南遷公以死守宗祀嚴武惠承制授公忠武校尉從事戎幕十有餘年亂定得歸田里自號鳳山逸叟日課僮僕力田教子讀書每戒之曰自汝遠祖令公儒素超宗登仕版者代不乏人箕裘之業不可廢也三子遵之竟得成立至元十七年歲庚辰以次子桓構共為朝官就祿養焉明年夏六月丁卯夫人薛氏以疾終命桓等歸葬於東平北乘丘山

陽之先塋將行戒之曰封樹畢即俱來是歲冬十月乙未與長子楨還家卒於行館辛亥祔葬焉享年八十有四公天資誠敬純善重厚寡言飲食不問美惡貧居晏如亦未嘗有不足之念犯而不校曰柔能勝剛僮僕不率教者諭以溫言終不加訶責與人交愈久愈敬平生無狎友性喜讀書尤嗜古文篆隸遂極其趣夫人亦士族為婦為母順姑敬夫慈子中表可法壽七十有四三男楨桓構楨為山東濱鹽司勾判官女二人長適高福

次適蔣起男孫二人士煥士燾女孫六人先世舊德備
於三老堂永錫堂記茲不復云銘曰

危檣巨舟勇回急流世繼其美不忤不求積而不廢雙
鶚橫秋敷歷中外有為有猷扶搖天風一日九州雲路
方始朱顏黑頭未見其止邈焉寡儔乘丘蒼蒼泉水悠
悠王氏塋域羊虎松楸若堂之封纍纍塚丘五百年中
大夫公侯表碣碑銘珠貝金瓔我何人斯荒辭贅疣竊
助孝思歲時薦羞

大元故順天路總管府權府事王公神道碑

治亂廢興之氣機隱伏於冥冥而發見於昭昭惟明者見之才者因之或出或處與時偕行金主紹承世宗章宗五十年太平之緒優游踐祚而識者憂之知其無人君之度非南面之器也未幾遇弒我太祖皇帝一舉而金祚不守是時屈伏草莽者齊舉並起雲會響應順天蔡國公羣豪之一也而權府王公實贊成之公名沂字振文童幼穎悟過人比冠通方識務金主走汴燕薊騷

然順天迫於燕公揆以人情天意知帝王之有真天命
之在北處身亂離中與人豈弟樂易不樹風岸人多愛
慕願與之交遇事明敏謀議處決動合衆意時雖板蕩
凶殘儕輩或語訟紛競必諄諄切切勸以德義戒以法
律使人和解而服罪以是人爭歸之所居成聚蔡國張
公起閭里相帥歸命我太祖皇帝謨畫軍事多從公出
順天既內附蔡國公承制辟公錄事判官兼規措大使
不再暮流竄者還僉辭以幹局稱輿議請命改充本路

總管府判官是時四方猶未平例以長官主征伐民政
悉聽於倅貳公均租庸謹調度扶弱推強風雨寒暑不
敢告勞屬郡鄜州號為難治加以蝗旱相仍流散未集
以公廉能陞知鄜州事敦本抑末篤教緩刑吏不嚴而
畏民不戒而勸未幾擢權順天府事同僚優游仰成府
治當南北要衝郵傳如織而民不知擾退食雍容讀書
學道煮茗賦詩延接賓友晚年詩益工以老致政一日
寢疾遺訓諸子曰我白衣至此本無他能平日所守者報

國以忠接物以誠而已言絕笑談而逝享年七十有三
夫人艾氏婦德母儀中表可法壽七十有八四子仲仁
仲義仲禮仲智仲仁即同僉公也以書自東川來諭其
子宏曰吾父子兄弟蒙國家福澤既優既渥誓以死報
惟光昭先人之令德無片石以旌紀負罪何言汝當承
吾之志乞文以圖不朽使吾後嗣有以知祖考積德累
功之漸子孫蒙慶之自汝為我力成之宏既承命持侍
衛親軍萬戶府從事安陽王可與之狀來以神道碑請

銘銘曰

虎頤未鬚遭時艱虞枕戈講學弁武心儒衆不可失藏
疾納污識真歸命振袂亨衢良二千石聲流八區引年
致仕左詩右書富貴壽考德業聲譽人或不足公獨有
餘孰謂涓釣而無遠圖孰謂莘耕老死犁鋤處不失義
出應時須同我太平武畧文謨子孫繩繩玉佩瓊裾勒
銘豐石光照幽墟百世不磷過者下車